

A Zernez nascha ün nouv center industrial

Da primavaira da prossem on dess gnir inaugurà il nouv center per mansteranza a Zernez, il qual vain realisà da la Engiadina Recycling AG. Sün üna surfatscha da circa 21 000 meters quadrat daja garaschas suotterranas, localitats per firmas ed abitaziuns grondas.

MARTINA FONTANA

La prüma palada pel nouv center da mansteranza i'l quartier da Muglinè es gnüda fatta in avrigl da quist on. Intant es fabrichà il plan suotterrain, il plan terrain ed il prüm plan. Il stabilimaint ha üna lunghezza da 24 meters ed üna larghezza da 33 meters. Mincha plan cumpiglia bundant 700 meters quadrat terrain e po gnir tut a fit eir in parts parzialas. «Nos intent es da spordscher cul nouv center a la mansteranza ed affarists üna plattafuorma per as sviluppar», disch Jordana Depeder da la Engiadina Recycling AG a Zernez. Concret vögla quai dir, cha scha qualchün haja l'intent da fundar s'aigna firma, dad ingrondir sia firma existenta o da simplamaing vulair esser preschaint cun sias sportas immez l'Engiadina, po'l far quai i'l nouv complex industrial a Zernez. «Nus vulain dar a tuots la schanza da s' sviluppar e da survgnir grazcha a l'infrastructura preschainta motivaziun e curaschi per far ils prossems pass per l'avengin», intun'la.

Terrain da fabrica d'industria restret

«Zernez es illa mità da l'Engiadina, svellet accessibel eir per abitants da la Val Müstair, da Livigno o da tschella vart dals pass chi lavuran e transportan in nosa regiun e perquai sgüra ün bun lö per la vurar e viver», argumentesch'la. Ella pensa quia per exaimpel chi's pudes forsa drivir a Zernez ün'apoteca, la quala nun exista fin quia in cumün, da pussibilitar a qualche veterinari da lavurar in ün cumün chi ha fich bieras bes-chas chasanas e muaglia da tuot gener, ma eir



L'inauguraziun dal nouv center industrial a Zernez es previsa in gün da l'on chi vain.

fotografia: Jon Duschletta

a firmas specialisadas da computer, dad indrizs dad IT Support ect. «Intant vaina fittà üna pitschna massa da tuot las capacitats existentas, ma quai as müdarà amo», manaj'la be intusiasssem. E quel as douvra tenor ella per investir ün import remarchabel in quist proget in ün temp pac bun per la mansteranza. «Nus vain a Matthias Bulfoni da Susch sco impressari general, il qual ha üna grond'experiencia

per realisar progets grondes e chi sa eir co trattar cullas instanzas pertoccas», declet'la. E ch'ültra da quai, sajan las zonas cun terrain d'industria a Zernez restretas: «Ushè vain nus provà da trar a nüz tuot il pussibel».

Duos access pel stabilimaint

Il stabilimaint in fabrica es situà tanter la chasa da las Ouvras Electricas d'En-

giadina e la garascha Auto Maz cun duos access: Ün da la via maistra nan e l'oter nan dal quartier da Muglinè», declera Jordana Depeder ulteriurs detagls importants. Cha las piazzas da parcar suotterranas hajan l'access nan dal quartier Muglinè, sajan var ses meters otas e pussibilteschan perquai eir a possessuors da veuculs grondas, da tour a fit piazzas. «Nus svesv dovrain

raduond 450 meters quadrat dal terrain suot terra per parcar nosas machines e per tillas chürar e lavar», declera Jordana Depeder. Cha'l rest da la piazza gnia fittada, quint'la da lur visiuns. Tant las abitaziuns sco eir il rest dals plans per lavuors da mansteranza e parkegis suotterrans, dessan dvantar accessibels il plü tard in gün da prossem on.

Da chavaliers fin al «La La Land»

Il chomp da musica «16plus», organisà da l'Uniu da musica dal district 1, ha lö ingon per la novavla jada. Passa 50 musicantas e musicants fan adöver da quista spierta particulara.

Mincha duos ons s'inscuntran musicantas e musicants da l'Uniu da musica dal district 1 pel chomp da musica «16plus». Ingon vain quist chomp organisà per la novavla jada e sco usità sun las provas da musica a Zernez ed a Samedan. Tour part als trais dis cun uras intensivas da musica ed ün concert final das-chan musicantas e musicants a partir da 16 ons. Plünavant ston els esser commembres d'üna società da musica da l'Engiadina, Samignun, Val Müstair, Puschlav o Bergiaglia. Passa 50 musicantas e musicants da la regiun s'han partecipats d'incuort a Zernez a las provas da register ed a la prüma prova cumünai. L'ultima fin d'eivna d'october s'inscuntran els a Samedan per ulteriuras provas e per exercitar il program da concert insenbel cul dirigent Roman Caprez.

«Da prüma davent ün success»

L'Uniu da musica dal district 1 organischa sper il chomp da musica «16plus» eir divers cuors per dirigents e

per musicantas e musicants differents lavuratori da musica, produziuns libras per solists ed ensembles e la Festa da musica districtuala. Ün dals intents da l'uniun es da promover las commembres e'ls commembres da tuot las etats chi fan part a las singulas societats da musica. Il chomp da musica «16plus» es dvantà üna tradiziun ed es bainvis pro las partecipantas e partecipants. Quai demuossa eir il nomer constant da las annunzchas per quist chomp da musica. «Eu pens cha nos concept per quist chomp da musica fuorma la basa pel success cha nus vain gnü da prüma davent», disch Jachen KiENZ, il president da l'Uniu da musica dal district 1. Üna vouta manzuna'l in quist connex la dürada da be üna fin d'eivna e mez e la pussibilità d'exercitar ün program pretensius insenbel cun ün dirigent da professiun.

Giodiar la compagnia

Per la prüma jada da la partida es la giuvna cornetista Larissa Bott da Valchava, chi'd es commembra da la Società da musica Ftan. «Dürant üna sairada da compagnia m'ha rendü attent il president a quist chomp da musica», s'algor'da. Ils tocs plü pretensius pretendan eir dad ella ün pa daplü, «be cun exercitar vain quai tuot in uorden.» Sper la sfida musicala gioda ella la compagnia e las novuas amicizhas. Robert Koch da Ramosch as partecipescha cun sia tuba regularmaing al chomp da mu-



Il chomp da musica «16plus» ha lö ingon per la novavla jada, per la segunda jada cul dirigent Roman Caprez.

fotografia: Nicolo Bass

sica «16plus». «Eu am partecipesch jent a quist chomp da musica, i s'inscuntra adüna darcheu ils medems collegs e musicalmaing as poja profiter fich bles», disch Koch. Cun l'ir dals ons ha'l impris a leger plü bain ils movimaints dals dirigents, impustüt scha'l dirigent nun es per la prüma vouta davent l'Orchester dal chomp da musica «16plus». «Il nivel dals tocs cha nus sunain ingon es identic a quel da nosa società da musica», uschè il musicant da Ramosch.

Sco usità es eir ingon previs ün concert final i'l Rondo a Puntraschigna. A las auditturas e'ls audittuors spetta ün viadi chi tendescha da tocs moderns, concertants fin a quels plü tradiziunals. Ushè as poja tadlar la marcha cuntschainta «Bundesrat Gnägi-Marsch», cumponüda d'Albert Benz o lura ils highlights dal film «La La Land», arrandschà da Michael Brown. Plü pretensius per las musicantas e'ls musicants es il toc concertant in trais parts «Ivanhoe» dal composit Bert Apperment. Il cuntschaint cudesch «Ivan-

Segunda jada cun Roman Caprez

Ils responsabels da l'Uniu da musica dal district 1 han pudü ingaschar per la segunda jada al dirigent Roman Caprez. Cun ünbesch ons ha frequentà Caprez las prümas uras da musica culla trumbetta e tschinch ons plü tard ha'l impris a sunar la posauna pro Iso Albin. D'utuo da l'on 1999 ha'l cumanzà seis stüdi da musica a la Scuol'ota da musica a Turich ed ha survgnì in gün 2004 seis diplom da concert per orchestres. Roman Caprez ha instrui a la Scuola da musica da la Surselva ed ha dirigì d'ürant quel temp la Società da musica Falera e l'Orchester instrumental da giuventüna d'Ebikon. Hoz es el magister da musica a la Scuola da musica Rontal ad Ebikon, dirigent da la Brass Band Sursilvana e dirigida diversas societats da musica illa regiun da Lucerna e da Zug. (anr/afi)

«Ivanhoe» da Walter Scott (1791) ha servi ad Apperment sco basa per sia cumposiziun. L'istorgia quinta la vita d'ün chavaliier chi cumbatta per seis ideals, chi ha da decider tanter l'amur e la lojalità ed a la fin prorumpa üna guerra. (anr/afi)

Il concert dal chomp da musica «16plus» ha lö in dumengia, ils 28 october, il Rondo a Puntraschigna e cumainza a las 17.00.